

渠勒國王治鞬都城

師古曰鞬音居言反

去長安九千九百五十

里戶三百一十口二千一百七十勝兵三百人東北至

都護治所三千八百五十二里東與戎盧西與婼羌北

與扞彌接

于闐國王治西城去長安九千六百七十里戶三千三

百口萬九千三百勝兵二千四百人輔國侯左右將左

右騎君東西城長譯長各一人東北至都護治所三千

九百四十七里南與婼羌接北與姑墨接于闐之西水

皆西流注西海其東水東流注鹽澤河原出焉

蘇林曰即中國

河多玉石

師古曰玉之璞也一日石之似玉也

西通皮山三百八十里